

Dato: 25.03.2022

Høyringsuttale

Høyringsuttale om endringar i domstolstruktur, Sogndal kommune, mars 2022

Justis- og beredskapsdepartementet har sendt på høyring forslag om å gjeninnføre domstolsstrukturen frå før domstolsreforma 2021.

Utgangspunktet til Regjeringa er å «gjeninnføre strukturen for domstolane før domstolsreforma av 2021 for å ivareta innbyggjarane sin rettstryggleik og sikre sjølvstendige domstolar med stadleg leiing, med unntak for domstolar der domstolsleiar, kommunane i rettskretsen og dei tilsette gjennom sine tillitsvalde er samde om å oppretthalde dagens struktur.»

Jordskifteretten i Sogn og Fjordane har i dag 3 likestilte og bemanna rettsstader, på Nordfjordeid, i Sogndal og Førde. Rettsstadene har i dag felles leiing, lokalisert i Førde. Sogndal kommune meiner det er viktig å ha ein domstolsstruktur som sikrar grunnleggande rettssikkerheit og gode, tilgjengelege tenester over heile landet. Dette er med å sikre tilliten og legitimiteten til domstolen.

Tilbakemeldingar frå brukarar av, leiing og tilsette ved jordskifteretten syner at den organisatoriske endringa, med ei felles eining, har vore positiv. Det gjeld utvikling av fagkompetanse og rekruttering, styrkt kvalitet og tilgang på tenester for innbyggjarar og næringsliv.

Framover må det vere eit mål å vidareutvikle og styrke domstolane. Sogndal kommune meiner at rettsstadene må sikrast lovmessig, der Stortinget bestemmer struktur og organisering. Sogndal, Nordfjordeid og Førde må halde fram som tingstader og likeverdige kontorstader i ein felles organisasjon. Sogndal kommune meiner også at leiarressursar på alle dei tre kontor- og tingstadene vil styrke organisasjonen. For Sogndal kommune er det viktig med ein bemanna rettstad, og at fagmiljøet består og har høve til å utvikle seg

Sogndal kommune bygger si vurdering av domstolsorganiseringa på erfaringane frå leiing, tilsette og brukarar, og på utgreiingane frå domstolsutvalet. Det tilseier at domstolen bør vidareutviklast basert på dagens organisering og struktur.

Arnstein Menes
Ordførar